

DEPARTMENT OF HEALTH

NO. 328


07 APRIL 2017

TSEBIŠO YA MMUŠO

KGORO YA MAPHELO

HEALTH PROFESSIONS ACT, 1974 (MOLAO 56 WA 1974)**MELAWANA YE MABAPI LE NGWADIŠO YA BAITHUTI BA TŠA GO KWA KA
DITSEBE**

Tona ya maphelo, go ya ka karolo 61(1) (a) (i) ya *Health Professions Act, 1974* (Molao 56 wa 1974), mme morago ga ditherišano le Khansele ya Diprofešene tša Maphelo ya Afrika Borwa, o dirile melawana mo Šetuleng.



NGAKA AARON MOTSOLEDI
TONA YA MAPHELO
LETŠATŠIKGWEDI: 9

ŠETULE

Dihlalošo

1. Mo melawaneng ye, " **Molao**" o ra *Health Professions Act, 1974* (Molao 56 wa 1974), mme mmolelwana ofe goba ofe wo o nago le hlalošo Molaong, o tla šomiša hlalošo yeo, ntle le ge tshwaraganyo e hlaloša ka tsela ye nngwe —

"sehlongwa sa thuto seo se netefaditšwego" se ra sehlongwa sa thuto seo se netefaditšwego ke boto ya diprofešenale bakeng sa go phethagaletša katišo le thuto ya go kwa ka ditsebe;

"boto ya profešenale" e ra Boto ya Profešenale ya Polelo, Leleme le Diprofešene tša Go kwa ka ditsebe tšeo di hlanngwego go ya ka karolo 15 ya Molao; mme

"moithuti" o ra motho yo a ithutelago tša go kwa ka ditsebe sehlongweng seo se netefaditšwego, goba motho yo a ngwadišitšwego bjalo ka moithuti wa dithuto tša go kwa ka ditsebe go ya ka Molao;

Ngwadišo bjalo ka moithuti

2. (1) Moithuti o tla romela go mongwadiši kgopelo ya ngwadišo bjalo ka moithuti mo foromong yeo e phethagaleditšwego mohola wo ke boto ya profešenale go ya ka ditaelo tša molawana (2)—

(a) bakeng sa moithuti yo a ngwadišwago sehlongweng seo se netefaditšwego ngwaga wa gagwe wa mathomo wa go ithuta, mo dikgweding tše nne tša ngwadišo ye; goba

- (b) bakeng sa moithuti yo a kgetholotšwego ngwageng wa mathomo goba wa bobedi wa thuto, mo dikgweding tše nne tša ngwadišo ye mo ngwageng wa bobedi goba wa boraro wa dithuto, ka tatellano; goba
- (c) bakeng sa moithuti yo, ka letšatšikgwedi la kgatišo ya melawana ye, a setšego a thomile ka dithuto tša gagwe sehlongweng sa thuto seo se netefaditšwego, mo dikgweding tše nne go thoma ka letšatšikgwedi la kgatišo ya melawana ye.

(2) Kgopelo ya ngwadišo bjalo ka moithuti e tla sepela le—

- (a) khophi ya moithuti yoo ya tokomane ya boitsebišo goba setifikeiti sa matswalo goba, ge moithuti a palelwa ke go romela ye nngwe le ye nngwe ya ditokomane tše, bohlatse bjo bongwe bja mengwaga ya gagwe le maina a nepagetšego ka moo go ka amogelwago ke mongwadiši, mme le bakeng sa phetolo ya leina ka lebaka la lenyalo, khophi yeo e netefaditšwego ya setifikeiti sa lenyalo
- (b) setifikeiti sa go netefatša gore moithuti yoo o thomile dithuto tša gagwe thutong goba dithutong sehlongweng sa thuto seo se netefaditšwego, mme setifikeiti se tla laetša ngwaga wa thuto le letšatšikgwedi leo moithuti a ngwadišitšwego ka lona; le
- (c) tefelo ya ngwadišo.

(3) Kgopelo ya ngwadišo bjalo ka moithuti ka moithuti wa moeti gotšwa nageng ya ka ntle ga Afrika Borwa yo a amogetšwego sehlongweng sa thuto seo se netefaditšwego bakeng sa meholo ya thuto yeo e sego ya khwetšo ya boithutelo ya nako yeo e sa fetego ngwaga wo tee wa dithuto, e tla sepela le—

- (a) setifikeiti sa go hlatselo gore moithuti yo o thomile dithuto tše;
- (b) bohlatse bja ngwadišo bjalo ka moithuti go tša go kwa ka dtsebe ka bolaodi bjo bo lemogilwego bja ngwadišo nageng goba lefase leo e sego Afrika Borwa; le
- (c) tefelo ya ngwadišo.

(4) Moithuti yo a thomago dithuto tša gagwe morago ga go emiša dithuto tše nako ya botelele bja ngwaga wo tee o tla romela kgopelo ya ngwadišo gape mo dikgweding tše nne tša go thoma dithuto tše.

(5) Kgopelo yeo e hlalošitšwego go molawana (4) e tla sepela le—

- (a) setifikeiti sa go hlatselo gore moithuti yo o thomile dithuto tše;
- (b) setifikeiti sa mathomo sa ngwadišo ya peleng ka mongwadiši; le
- (c) tefelo ya ngwadišo.

(6) Go ya ka ditaelo tša molawana 3(3), leina la moithuti yo a emišitšego dithuto tša gagwe nako ya botelele bja ngwaga wo tee, efela yo a laetšago ka ngwaga le ngwaga ka tsela ye lengwalo maikemišetšo a gagwe a go tšwelapele ka dithuto tša gagwe, a ka se phumolwe retšisetareng.

(7) Moithuti yo a dirago kgopelo go ya ka molawana (4) mme yo a palelwago ke go romela setifikeiti sa mathomo sa ngwadišo, o tla dira kgopelo ya ngwalollo ye e netefaditšwego go mongwadiši, yeo e nago le tefelo yeo e lefišwago.

(8) Kgopelo ya ngwadišo, gammogo le ditokomane tše malebana le ditefelo, tše di rometšwego morago ga nako ye e beilwego ya dikgwedi tše nne, e tla hwetša kotlo ye e beilwego ya ngwadišo ya morago ga nako malebana le kgwedi ye nngwe le ye nngwe goba karolo ya kgwedi yeo e romelwago ka yona morago ga letšatšikgwedi.

(9) Ga go moithuti yo a tilego go ngwadišwa goba go ngwadišwa gape bjalo ka moithuti ka tlase ga Molao ntle le ge a obametše dinyakwa tša molawana wo ka moka.

(10) Mongwadiši o tla romela moithuti yo a ngwadišitšwego setifikeiti sa ngwadišo.

(11) Ge moithuti a fetola sehlongwa goba lenaneo le lengwe ka nako ya dithuto tša gagwe, boto ya profešenale e swanetše go eletšwa mo dikgweding tše nne tša phetošo ye.

Tshedimošo yeo e swanetšego go romelwa botong ya profešenale

3. (1) Sehlongwa sa thuto seo se netefadišwego mo Afrika Borwa, se tla romela botong ya profešenale ka la goba pele ga la 31 Mopitlo wa ngwaga wo mongwe le wo mongwe —

- (a) lenaneo la baithuti ka moka bao ba ngwadišitšwego ngwageng woo; le
- (b) lenaneo la baithuti ka moka bao ba tlogetšego dithuto tša bona mongwageng wo o fetilego.

(2) Mananeo ao a hlalošitšwego go molawana (1) a tla akaretša maina a baithuti ka botlalo, ngwaga wa dithuto le, mo go hlokegago, letšatšikgwedi la tlogelo ya thuto.

(3) Gammogo le mananeo ao a hlalošitšwego go molawana (1), sehlongwa sa thuto seo se netefadišwego se tla romela-

- (a) lenaneo la baithuti bao ba emišitšego dithuto tša bona nakwaneng ya dikgwedi tše di fetilego tše lesomepedi, leo le hlalošago mabaka a kemišo le letšatšikgwedi leo baithuti bao ba amegago ba swanetšego go tšwelapele ka dithuto tša bona; le
- (b) lenaneo la baithuti bao ba thomilego dithuto tša bona mo nakong ya dikgwedi tše di fetilego tše lesomepedi morago ga kemišo ya nakwana ya dithuto tše.

(4) Leina la moithuti le tla tlošwa retšisetareng ka bonako ge a ngwadišwa bjalo ka Mošomi wa tša go kwa ka ditsebe goba ka bonako ge mongwadiši a hwetša bohlatse bja gore moithuti o emišitše dithuto tša gagwe mo Afrika Borwa.

Thaetlele ye kopana

4. Melawana ye e bitšwa Melawana ye Mabapi le Ngwadišo ya Baithuti ba tša go kwa ka Ditsebe.